

Memperkasa Institusi Pendidikan Melalui Agihan Balik Zakat

Yusuf Haji-Othman¹, Mohd Fakhrudin Abdul Mukti²

¹Pensyarah Kanan, Kulliyah Muamalat dan Sains
Pengurusan,
Universiti Islam Antarabangsa Sultan Abdul Halim Mu'adzam
Shah,
Kuala Ketil, Kedah, Malaysia.

²Presiden, Rabitah Antarabangsa Alumni Al-Azhar Malaysia,
Petaling Jaya, Selangor, Malaysia.

Abstrak— Zakat merupakan sebahagian daripada kewangan Islam. Zakat adalah kewajipan agama yang diwajibkan kepada umat Islam yang memenuhi syaratnya. Kewajipan ini berlandaskan kepada al-Qur'an, hadith dan ijma'. Bayaran balik agihan zakat oleh Lembaga Zakat Negeri Kedah (LZNK) kepada institusi pendidikan diharapkan dapat memberi impak yang positif kepada kutipan zakat pendapatan oleh Lembaga Zakat Negeri Kedah (LZNK). Disamping itu, bayaran balik agihan zakat ini diharapkan akan dapat membantu memperkasa institusi-institusi pendidikan yang terlibat. Skim bayaran balik agihan zakat ini merupakan langkah yang bestari yang merupakan situasi yang memberi manfaat kepada kedua-dua pihak. Pihak LZNK mendapat manfaat daripada skim ini apabila skim ini akan berjaya meningkatkan keyakinan pembayar zakat pendapatan dari warga pendidik terhadap agihan zakat oleh LZNK yang seterusnya akan dapat membantu meningkatkan hasil kutipan zakat pendapatan oleh LZNK pada masa hadapan. Manakala institusi pendidikan pula akan memperoleh manfaat apabila agihan balik ini dimanfaatkan untuk mencapai sebahagian daripada objektif JPN disamping dapat membantu secara langsung warga pendidik yang dikategorikan sebagai asnaf. Walau bagaimanapun, agihan dan perbelanjaan yang dilaksanakan oleh institusi-institusi pendidikan perlu mengikut mekasmisma tertentu dan perlu dipantau dan diaudit dari semasa ke semasa untuk menjamin bahawa agihan dan perbelanjaan tersebut memberikan impak yang maksima dalam memperkasa institusi-institusi pendidikan dan memberi keyakinan kepada pembayar cukai bahawa cukai yang mereka sumbangkan kepada Lembaga Zakat Negeri Kedah (LZNK) diagih dan dibelanjakan secara efisien.

Katakunci — *memperkasa, institusi pendidikan, agihan balik, zakat.*

I. Pengenalan

Zakat merupakan sebahagian daripada kewangan Islam (Dusuki, 2012). Kewangan Islam merujuk kepada dua makna yang berbeza. Pertama, ia merujuk kepada cara Islam berurusan dengan agihan sumber, pengambilalihan dan pelaburan. Kedua, ia berkaitan dengan isu asas dalam kewangan seperti pengurusan risiko. Ciri tersendiri yang mendasari kewangan Islam yang membezakannya dengan kewangan konvensional ialah pematuhan kepada prinsip Syariah. Sebahagian prinsip Syariah termasuk larangan riba, larangan gharar dalam kontrak, larangan perjudian (maysir), larangan melibatkan diri dalam kegiatan perniagaan dan pelaburan yang tidak dibenarkan (bukan halal). Di samping itu, prinsip Syariah juga termasuk dana zakat, waqf dan sadaqah untuk membiayai projek pembangunan kerajaan yang tertentu dan pembangunan semua urus niaga dan pelaburan perniagaan Islam yang halal (Dusuki, 2012).

Dari aspek sejarah, pada tahun-tahun awal pemerintahan Islam, zakat merupakan sumber pendapatan dan kewangan utama negara. Pada masa pemerintahan Nabi Muhammad (S.A.W), tiada cukai yang dikenakan ke atas rakyat pada masa itu selain daripada zakat yang dikenakan pada tahun kedua setelah hijrah (Barizah, Bakar, Rahim, & Rahman, 2007). Ringkasnya, zakat bukan sahaja berfungsi sebagai mekanisme kewangan kerajaan Islam dan pengagihan semula pendapatan tetapi juga bertindak sebagai mekanisme pembangunan dan pengurangan kemiskinan.

Sama seperti cukai, zakat adalah suatu kewajiban dan harus dikutip dan diagihkan oleh pemerintah, walaupun zakat boleh diberikan langsung kepada penerima tanpa campur tangan pemerintah. Menurut Syariah, perbendaharaan pusat (Baitulmal) diberikan amanah untuk mengumpulkan zakat (Barizah et al., 2007). Tidak seperti cukai yang dikenakan dan dikuatkuasakan melalui undang-undang buatan manusia, zakat adalah kewajiban yang dikenakan oleh Allah. Oleh itu, zakat adalah kewajiban keagamaan, tidak boleh dielakkan dan dihindari oleh umat Islam (Barizah et al., 2007).

Zakat telah mula dikenakan pada tahun kedua selepas hijrah. Rasulullah (S.A.W.) telah melantik pengurus zakat yang tugasnya mengutip dan mengagihkan zakat kepada penerimanya. Oleh itu, zakat merupakan pendapatan pertama dan utama dalam sistem fiskal kerajaan Islam. Pada masa itu, Rasulullah (S.A.W.) tidak mengenakan apa-apa cukai. Dalam

kes di mana pendapatan zakat tidak mencukupi untuk menampung pembiayaan kerajaan, Rasulullah (S.A.W.) terpaksa bergantung kepada sumbangan sukarela dan pinjaman (Kahf, n.d.). Zakat telah dikenakan ke atas barang-barang tertentu seperti al-mashiya (haiwan), al-'ayn (emas, perak, dan syiling), al-harth (hasil pertanian), al-rikaz (harta karun) disamping barangan dan madu (Saeed Siddiqi, 1984).

Al-Qur'an menyatakan lapan kategori asnaf zakat.

﴿ إِنَّمَا الصَّدَقَاتُ لِلْفُقَرَاءِ وَالْمَسْكِينِ وَالْعَامِلِينَ عَلَيْهَا وَالْمُؤَلَّفَةِ قُلُوبُهُمْ وَفِي الرِّقَابِ وَالْغَارِمِينَ وَفِي سَبِيلِ اللَّهِ وَابْنِ السَّبِيلِ فَرِيضَةً مِّنَ اللَّهِ وَاللَّهُ عَلِيمٌ حَكِيمٌ ﴾

(القرآن: التوبة: 60)

Sesungguhnya sedekah-sedekah (zakat) itu hanyalah untuk orang-orang fakir, orang-orang miskin, amil-amil yang menguruskannya, dan orang-orang muallaf yang dijinakkan hatinya, dan untuk hamba-hamba yang hendak memerdekakan dirinya, dan orang-orang yang berhutang, dan untuk (dibelanjakan pada) jalan Allah, dan orang-orang musafir (yang keputusan) dalam perjalanan. (Ketetapan hukum yang sedemikian itu ialah) sebagai satu ketetapan (yang datangnya) dari Allah. Dan (ingatlah) Allah Maha Mengetahui, lagi Maha Bijaksana.

(Al-Qur'an: Al-Taubah: 9, ayat: 60)

Dalam era pemerintahan awal Islam, zakat merupakan sumber pendapatan utama dalam kerajaan Islam. Walau bagaimanapun, dalam dunia moden hari ini, cukai merupakan sumber pendapatan utama bagi kerajaan. Di Malaysia, zakat bukanlah sumber pendapatan utama bagi kerajaan persekutuan. Zakat ditadbir oleh Majlis Agama Islam Negeri yang diketuai oleh Sultan dan Yang Dipertua Negeri masing-masing di Malaysia. Terdapat pelbagai pusat zakat untuk menguruskan kutipan dan agihan zakat. Setiap pusat zakat diberi kuasa untuk menerima kutipan zakat. Kutipan zakat kemudiannya digunakan untuk diedarkan kepada asnaf yang layak, serta untuk pusat zakat itu sendiri ("Zakat Mgt in Malaysia," n.d.).

II. Falsafah Zakat

Zakat adalah kewajipan agama yang diwajibkan kepada umat Islam yang memenuhi syaratnya. Kewajipan ini berlandaskan kepada al-Qur'an, hadith dan ijma'. Zakat secara harfiah bermaksud penyucian, pertumbuhan, peningkatan dan kebersihan (Abd Halim, Mohamed Saladin, Rozman, & Siti Mariam, 2014; Hj Ibrahim, 2008; Embong et al., 2013). Penyucian termasuk fizikal dan spiritual, di mana fikiran pemilik harta bebas dari hukuman ilahi yang berkaitan dengan kekayaannya dan zakat juga memberikan barakah kepada

kekayaan dan harta. Menurut Ibn Taymiyyah, ini bermakna menjadikan jiwa pembayar zakat lebih baik secara moral dan spiritual dan kekayaannya menjadi bersih (Abu Bakar, Ibrahim, & Md Noh, 2014; Abdallah, 1998)

Dari segi istilah, zakat ditakrifkan sebagai "jumlah tertentu wang yang wajib yang dibayar oleh setiap Muslim yang cukup umur, yang secara mentalnya stabil, merdeka, dan berupaya dari sudut kewangan, kepada kategori orang tertentu" (Abu Bakar et al., 2014). Zakat juga ditakrifkan sebagai "hak yang sewajarnya atas harta tertentu, dalam peratusan tertentu dengan syarat cukup haul dan nisab" (Ahmed, 2004). Jumhur ulamak mencapai persetujuan bahawa zakat adalah sebahagian dari kekayaan yang harus dibayar kepada asnaf yang dikhususkan. Pendek kata, zakat dibayar oleh beberapa kategori orang Islam dan memberi kepada kumpulan lain dalam masyarakat (Saeed Siddiqi, 1984; Ahmed, 2004).

Menurut sebahagian ulamak, terdapat dua kategori harta zakat: harta zahir (amwal al-zahirah) dan harta batin (amwal al-batinah). Harta zahir (amwal al-zahirah) adalah harta yang dapat dilihat dengan mudah (uruf) oleh masyarakat seperti hasil pertanian dan ternakan. Harta batin (amwal al-batinah) merupakan harta yang tidak mudah dilihat oleh orang awam secara uruf.

Nisab zakat merujuk kepada jumlah minimum aset yang dikenakan zakat yang diwajibkan membayar zakat. Sekiranya aset mencapai nisab, ia menjadi zakat yang wajib dibayar. Zakat dikira atas jumlah aset termasuk jumlah nisab. Zakat diwajibkan ke atas barang-barang tertentu seperti ternakan, wang tunai, emas, perak, dan barangan yang diniagakan selepas cukup haul. Walau bagaimanapun, terdapat barang-barang tertentu seperti hasil pertanian yang zakat tidak memerlukan cukup haul tetapi dibayar pada masa penuaian.

Terdapat tiga kadar zakat yang dikenakan bergantung pada jenis aset. Kadar zakat ditetapkan pada 2.5 peratus ke atas wang tunai, emas, perak dan barang dagangan. Sebaliknya kadar zakat adalah 10 peratus ke atas hasil pertanian yang disirami hujan, atau oleh sungai dan mata air. Kadar zakat adalah 5 peratus jika hasil pertanian menggunakan pengairan yang dikeluarkan dari telaga yang digerakkan oleh binatang atau manusia atau mesin (Al Qardawi, 1973).

Kewajipan membayar zakat mempunyai banyak tujuan. Salah satu tujuan zakat ialah menyucikan dan membersihkan jiwa dan kekayaan pembayar zakat. Satu lagi tujuan adalah untuk memastikan asnaf zakat seperti yang dinyatakan dalam Al-Qur'an diberikan hak mereka. Selain itu, zakat juga bertindak sebagai suatu kaedah agihan kekayaan dari golongan kaya kepada golongan miskin.

A. Hukum Membayar Zakat Pendapatan

Isu berkaitan hukum membayar zakat pendapatan merupakan isu yang telah lama dibahaskan. Para sarjana Islam di seluruh dunia mempunyai pendapat yang berbeza mengenai hukum membayar zakat pendapatan (Nur Barizah, 2008). Walau bagaimanapun, terdapat sebahagian sarjana Islam yang telah mempersetujui bahawa zakat pendapatan merupakan

kewajipan agama ke atas atas pendapatan peribadi yang diperolehi daripada sumber atau kegiatan yang melibatkan tenaga buruh yang merangkumi yuran profesional, pampasan buruh, gaji, upah, bonus, geran, hadiah, pendapatan dividen dan sebagainya (Abu Bakar, Ibrahim, & Md Noh, 2014). Majlis Fatwa Kebangsaan mencapai persetujuan pada 22 Jun 1997 bahawa zakat pendapatan adalah wajib bagi setiap individu Muslim yang telah memenuhi syarat-syarat pemilikan sempurna, nisab dan haul (Abdul Aziz & Abdullah, 2013). Kedah, salah satu negeri di Malaysia, telah mewartakan kewajipan membayar zakat pendapatan pada 19 April 1986 di bawah seksyen 38 (2) Undang-undang Pentadbiran Islam Kedah 1962 Rang Undang-undang Kerajaan No. 146 (Tarimin, 1995).

B. Fatwa Kontemporari Berkaitan Hukum Membayar Zakat Pendapatan

Harta yang dikenakan zakat yang disebut dalam Al-Qur'an dan Sunnah menunjukkan bahawa harta yang menjadi kekayaan pada masa Nabi (S.A.W.) disebut secara jelas supaya semua orang kaya yang memiliki lebih harta mempunyai kewajipan untuk membayar zakat. Harta yang dikenakan zakat pada masa itu termasuk aliran pendapatan (misalnya, hasil pertanian) serta stok aset. Terdapat banyak item pendapatan dan kekayaan yang baharu pada masa kini yang merupakan sebahagian daripada kekayaan individu dan institusi. Tetapi item kontemporari ini tidak disebut dalam buku-buku Fiqh yang klasik. Para ulama kontemporari telah banyak membincangkan isu-isu ini dan berpendapat bahawa banyak item kontemporari perlu dimasukkan sebagai harta yang dikenakan zakat.

Menurut Al Qardawi (1973a), gaji dan pendapatan profesional dianggap sebagai aset yang dikenakan zakat jika jumlah pendapatan tahunan mencapai nisab setelah menolak jumlah yang diperlukan untuk perbelanjaan peribadi. Kadar zakat gaji dan pendapatan adalah 2.5 peratus, sama seperti kadar zakat ke atas wang dan inventori perdagangan. Kadar zakat ke atas pendapatan sewa dari harta seperti hartanah dan pendapatan dari kilang-kilang dan perusahaan produktif yang serupa, termasuk industri pertanian dan ternakan adalah 5 peratus daripada pulangan kasar, atau 10 peratus daripada pulangan bersih yang dinisbahkan kepada pulangan tanah pertanian (Al Qardawi, 1973a). Di samping itu, nilai bersih perniagaan termasuk aset tetap yang terdapat pada akhir tempoh perakaunan juga dikenakan zakat kerana aset tetap perniagaan adalah hartanah yang bertujuan untuk membuat keuntungan yang menyerupai barang untuk dijual. Ini bermakna bahawa kilang-kilang, hartanah sewaan dan perniagaan lain juga dikenakan zakat (Kahf, 1997).

Menurut Al Qardawi (1973a), fuqaha' mencapai konsensus bahawa pemerintah bertanggungjawab untuk kutipan dan agihan zakat dalam masyarakat Islam. Semasa zaman Nabi Muhammad (S.A.W.), pengurusan zakat berada di bawah kawalan pemerintah, dan pemerintah telah melantik amil zakat yang dipertanggungjawabkan untuk mengutip dan mengagihkan zakat (Al Qardawi, 1973b). Majoriti fuqaha' menyepakati bahawa zakat ke atas harta zahir perlu dikutip

dan diagihkan oleh kerajaan. Al Qardawi (1973b) menyebut bahawa kerajaan bertanggungjawab untuk memastikan bahawa orang Islam yang layak membayar zakat wajib membayar zakat mereka ke atas harta batin. Sekiranya individu Islam yang layak membayar zakat gagal melakukannya, maka kerajaan bertanggungjawab untuk kutipan kedua-dua jenis (harta zahir dan harta batin).

iii. Kesan Agihan Balik Zakat kepada Kutipan Zakat oleh Lembaga Zakat Negeri Kedah

Lembaga Zakat Negeri Kedah (LZNK) telah memperkenalkan mekanisma agihan balik zakat dimana 3/8 daripada kutipan zakat pendapatan oleh staf-staf sesebuah institusi dan organisasi dikembalikan semula kepada institusi dan organisasi tersebut. Hal ini memberi impak yang positif kepada kutipan zakat pendapatan itu sendiri. Staf-staf yang terlibat mendapati meningkatkan kepatuhan membayar zakat pendapatan kerana mereka bersikap lebih positif untuk membayar zakat pendapatan melalui skim potongan bulanan kerana mereka dapat melihat secara telus impak kepatuhan membayar zakat pendapatan kepada LZNK (Haji-Othman, Alwi, Sheh Yusuff, & Mohd Saufi, (2017); Farah, Haji-Othman, & Omar (2017); Sareye & Haji-Othman (2017); Haji-Othman, Mohamed Fisol, & Sheh Yusuff (2018)).

iv. Kesan Agihan Balik Zakat kepada Institusi Pendidikan

Lembaga Zakat Negeri Kedah (LZNK) telah melaksanakan langkah-langkah yang proaktif ke arah meningkatkan hasil kutipan zakat pendapatan dan juga memperkasa institusi pendidikan. Walau bagaimanapun, kertas kerja ini lebih memberi fokus kepada langkah yang kita sebut sebagai agihan balik zakat oleh LZNK kepada institusi pendidikan seperti Institusi Pengajian Tinggi dan juga sekolah-sekolah di seluruh negeri Kedah. Dalam kaedah agihan balik zakat ini, pihak LZNK mengembalikan semula 3/8 daripada hasil kutipan zakat pendapatan yang disumbangkan oleh institusi-institusi pendidikan tersebut.

Lembaga Zakat Negeri Kedah (LZNK) telah membuat agihan balik zakat berjumlah RM 3,377,108.40 kepada Jabatan Pendidikan Negeri Kedah pada Januari 2018. Agihan balik zakat pendapatan ini memberi peluang kepada Jabatan Pendidikan Negeri Kedah untuk mengagihkan semula agihan balik zakat pendapatan kepada golongan yang berkelayakan. Melalui skim agihan balik zakat ini, Lembaga Zakat Negeri Kedah (LZNK) telah memberi kuasa kepada Jabatan Pendidikan Negeri Kedah (JPN) untuk menjalankan tugas agihan balik sebanyak 3/8 daripada jumlah kutipan bayaran zakat yang disumbang oleh warga pendidik di Negeri Kedah kepada golongan asnaf iaitu fakir, miskin dan fisabilillah.

Bagi tujuan memperkasa institusi pendidikan di negeri Kedah, pihak JPN perlu merangka plan, strategi dan langkah

pelaksanaan yang berkesan supaya ianya memberi manfaat bukan sahaja kepada institusi pendidikan secara umumnya tetapi juga kepada warga pendidik yang tergolong sebagai asnaf iaitu fakir, miskin dan fisabilillah memandangkan kekangan kutipan zakat yang terhad di Negeri Kedah setakat ini. Ini merupakan langkah yang bestari yang merupakan situasi yang memberi manfaat kepada kedua-dua pihak. Pihak LZNK mendapat manfaat daripada skim ini dengan harapan skim ini akan berjaya meningkatkan keyakinan pembayar zakat pendapatan dari warga pendidik terhadap agihan zakat oleh LZNK. Hal yang demikian seterusnya diharapkan akan dapat membantu meningkatkan hasil kutipan zakat pendapatan oleh LZNK pada masa hadapan. Manakala institusi pendidikan pula akan memperoleh manfaat yang luas apabila agihan balik ini dimanfaatkan untuk mencapai sebahagian daripada objektif JPN dan sekolah-sekolah yang diletakkan di bawah pentadbirannya disamping dapat membantu secara langsung warga pendidik yang dikategorikan sebagai asnaf.

Di samping itu, Lembaga Zakat Negeri Kedah (LZNK) memperuntukkan geran tahunan RM1.24 juta bagi membantu Pusat Penyelidikan dan Inovasi Zakat di Universiti Utara Malaysia (UUM) pada Januari 2018. Daripada jumlah itu, sebanyak RM300,000 diperuntukkan bagi pengurusan dan pentadbiran, proses pembangunan dan pemantauan (RM200,000), geran penyelidikan (RM300,000) manakala RM441,000 lagi adalah agihan zakat untuk membantu pelajar, warga (UUM) dan masyarakat setempat. UUM turut dilantik sebagai amil zakat dan sebahagian geran yang diperuntukkan ini merupakan agihan balik zakat pendapatan daripada kakitangan (UUM).

Universiti Islam Antarabangsa Sultan Abdul Halim Mu'adzam Shah (UniSHAMS) telah menubuhkan Pusat Kajian Fiqh Zakat pada Julai 2018 sebagai suatu usaha untuk menjalin kerjasama dengan Lembaga Zakat Negeri Kedah (LZNK). Antara objektif penubuhan Pusat Kajian Fiqh Zakat ini adalah:

1. Memperkasa bidang penyelidikan dalam fiqh zakat kontemporari.
2. Mewujudkan hub 'incubator' untuk pengurusan fiqh zakat bagi golongan *asnaf*.
3. Melaksanakan penyelidikan berhubung fiqh zakat serta pembangunan pengurusan kewangan sosial Islam dan kajian-kajian yang meliputi isu ekonomi & kewangan, Syariah dan perundangan yang berkaitan dengan zakat.
4. Mewujudkan perbincangan intelektual di kalangan sarjana dan pakar dalam bentuk seminar, bengkel, kolokium, persidangan, forum, simposium, diskusi intelektual dan dialog secara bersiri sama ada di peringkat kebangsaan dan antarabangsa.
5. Membantu Lembaga Zakat Negeri Kedah dalam mengumpul dan menyalurkan maklumat berkaitan zakat dalam bentuk penerbitan buku dan jurnal.

Empat kluster penyelidikan telah ditubuhkan di bawah Pusat Kajian Fiqh Zakat UniSHAMS iaitu:

1. Fatwa dan Perundangan
2. Sumber dan Agihan
3. Pelaburan dan Pengembangan
4. Pembangunan Asnaf

Setakat ini Pusat Kajian Fiqh Zakat belum menerima agihan balik zakat. Namun, pihak Pusat Kajian Fiqh Zakat UniSHAMS telah mula mengorak langkah melaksanakan sepuluh tajuk kajian berkaitan Fiqh Zakat iaitu:

1. Hukum Orang Islam Bukan Asnaf dan Bukan Islam Menggunakan Peralatan Lembaga Zakat Negeri Kedah.
2. Hukum Membayar Zakat Fitrah Selepas Hari Raya Aidilfitri Disebabkan Terlupa
3. Hukum Membayar Zakat Pendapatan Kepada LZNK
4. Hukum Agihan Zakat Kepada Bukan Islam
5. Hukum Agihan Zakat oleh Lembaga Zakat Negeri Kedah Kepada Rakyat Negeri Lain dan Negara Lain
6. Pelan Pelaksanaan Sistem E-Filing Zakat di Lembaga Zakat Negeri Kedah
7. Zakat Produktif, Mikro Kredit dan Qard Hasan
8. Zakat Bitcoin
9. Aplikasi Kontemporary Agihan Zakat kepada Asnaf
10. Pembayaran Kaffarah Zihar dan Agihan kepada Fakir Miskin

Demi memperkasa UniSHAMS, pihak Pusat Kajian Fiqh Zakat UniSHAMS akan menggunakan secara efisien dan sepenuhnya agihan balik zakat yang bakal diterima berpandukan kepada prosedur kewangan yang betul. Perbincangan tentang penggunaan wang agihan balik zakat secara efisien dan sepenuhnya akan diadakan dari semasa ke semasa dengan LZNK untuk diagihkan kepada asnaf yang layak. Peruntukan akan diagihkan kepada pengurusan dan pentadbiran, pembangunan dan pemantauan, geran penyelidikan disamping pelajar, warga UniSHAMS dan masyarakat setempat. Diharapkan Pusat Kajian Fiqh Zakat UniSHAMS turut dilantik sebagai amil zakat dan memperoleh agihan balik zakat pendapatan daripada kakitangan UniSHAMS.

v. Kesimpulan

Bayaran balik agihan zakat oleh Lembaga Zakat Negeri Kedah (LZNK) kepada institusi pendidikan diharapkan dapat memberi impak yang positif kepada kutipan zakat pendapatan oleh Lembaga Zakat Negeri Kedah (LZNK). Disamping itu, bayaran balik agihan zakat ini diharapkan akan dapat membantu memperkasa institusi-institusi pendidikan yang terlibat. Skim bayaran balik agihan zakat ini merupakan langkah yang bestari yang merupakan situasi yang memberi manfaat kepada kedua-dua pihak. Pihak LZNK mendapat

manfaat daripada skim ini apabila skim ini akan berjaya meningkatkan keyakinan pembayar zakat pendapatan dari warga pendidik terhadap agihan zakat oleh LZNK yang seterusnya akan dapat membantu meningkatkan hasil kutipan zakat pendapatan oleh LZNK pada masa hadapan. Manakala institusi pendidikan pula akan memperoleh manfaat apabila agihan balik ini dimanfaatkan untuk mencapai sebahagian daripada objektif JPN disamping dapat membantu secara langsung warga pendidik yang dikategorikan sebagai asnaf.

Walau bagaimanapun, agihan dan perbelanjaan yang dilaksanakan oleh institusi-institusi pendidikan perlu mengikut mekasmisma tertentu dan perlu dipantau dan diaudit dari semasa ke semasa untuk menjamin bahawa agihan dan perbelanjaan tersebut memberikan impak yang maksima dalam memperkasa institusi-institusi pendidikan dan memberi keyakinan kepada pembayar cukai bahawa cukai yang mereka sumbangkan kepada Lembaga Zakat Negeri Kedah (LZNK) diagih dan dibelanjakan secara efisien.

Rujukan

- [1] Abd Halim, M. N., Mohamed Saladin, A. R., Rozman, M. Y., & Siti Mariam, A. (2014). Zakat Index: Assesing the Performance of Zakat Organizations in Malaysia. In 2nd International Conference in Humanities, Social Sciences and Global Business Management (pp. 23–28).
- [2] Abdallah, M. H. (1998). Abdul Azim Islahi Economic Concepts of Ibn Taimiyah. *J. KAU: Islamic Economics*, 10, 67–72.
- [3] Abdul Aziz, M. A., & Abdullah, M. H. (2013). The Comparison between Zakat (Islamic Concept of Taxation) and Income Tax : Perceptions of Academician in the State of Perak , Malaysia. *International Conference on Business,Economics,and Accounting*, (March), 8.
- [4] Abu Bakar, A. A., Ibrahim, M. A., & Md Noh, S. (2014). *Zakat Management and Taxation*. Kuala Lumpur: IBFIM.
- [5] Ahmed, H. (2004). *Role of Zakah and Awqaf in Poverty Alleviation*. Islamic Research and Training Institute.
- [6] Al Qardawi, Y. (1973). *Fiqh al Zakah Volume I*.
- [7] Barizah, N., Bakar, A., Rahim, A., & Rahman, A. (2007). A Comparative Study of Zakah and Modern Taxation. *J. KAU, Islamic Economy*, 20(1), 25–40.
- [8] Dusuki, A. W. (Ed.). (2012). *Islamic Financial System Principles and Operations*. International Shari'ah Research Academy for Islamic Finance.
- [9] Embong, M. R., Taha, R., & Mohd Nor, M. N. (2013). Role of zakat to eradicate poverty in Malaysia. *Jurnal Pengurusan*, 39.
- [10] Farah, J. M. S., Haji-Othman, Y., & Omar, M. M. (2017). The Influence of Attitude, Religiosity, and Perception towards Law Enforcement on Intention towards Compliance Behaviour of Income Zakat among KUIN Staff in Kedah, Malaysia. *International Journal of Muamalat*, 1(1), 25–45.
- [11] Haji-Othman, Y., Alwi, I., Sheh Yusuff, M. S., & Mohd Saufi, M. S. A. (2017). The Influence of Attitude , Subjective Norm , and Islamic Religiosity on Compliance Behavior of Income Zakat Among Educators. *International Journal of Academic Research in Business and Social Sciences*, 7(11), 1110–1116.
- [12] Haji-Othman, Y., Mohamed Fisol, W. N., & Sheh Yusuff, M. S. (2018). The Moderating Effect of Islamic Religiosity on Compliance Behavior of Income Zakat in Kedah , Malaysia. *International Journal of Academic Research in Accounting, Finance and Management Sciences*, 8(2), 281–286. <http://doi.org/10.6007/IJARAFMS/v8-i2/4382>
- [13] Hj Ibrahim, P. (2008). Pembangunan Ekonomi Melalui Agihan Zakat: Tinjauan Empirikal. *Shariah Journal*, 16(2), 223–244.
- [14] Kahf, M. (n.d.). *Zakah*.
- [15] Kahf, M. (1997). *The Early Islamic Public Revenue System: Lessons and Implications*.
- [16] Saeed Siddiqi, M. A. (1984). Early Development of Zakat Law and Ijtihad. *J. Res. Islamic Econ.*, 2(1), 69–73.
- [17] Sareye, J. M., & Haji-Othman, Y. (2017). The Influence of Attitude, Subjective Norms and Service Quality on Intention to Pay Business Zakat Among Single Business Owners at Kuala Ketil, Malaysia. *International Journal of Novel Research in Humanity and Social Sciences*, 4(1), 100–107.
- [18] Tarimin, M. (1995). *Zakat Penggajian: Satu Penilaian Terbaru di Malaysia*. Universiti Malaya.
- [19] *Zakat Mgt in Malaysia*. (n.d.).